

「香港工程師週 2023」  
開幕禮  
會長卜國明工程師 演講辭  
2023年3月3日 (星期五)

財政司司長陳茂波、中聯辦王偉明部長、各位嘉賓、各位老師同學、各位朋友：

大家好！我謹代表香港工程師學會多謝各位百忙之中抽空出席「香港工程師週 2023」嘅開幕禮，我哋非常高興今日見到各界的朋友一同鼎力支持香港工程師學會嘅盛事。

今次「香港工程師週」以「Our Future · We Engineer 未來·一同創造」為主題，工程師學會一直深信未來是靠社會大眾一同攜手創造，而工程師作為建設社會嘅棟樑，我哋嘅工作正正係每一個城市發展進步嘅核心，所以我哋更加有責任推動香港社會發展，以專業知識為建設更美好香港作出貢獻。

談及建設社會，不得不提及香港多年來嘅繁榮穩定，除了有賴政府致力維持財政穩健，其實跟我哋城市每個基建項目，為每個市民衣食住行、提供生活必需嘅服務亦都息息相關。不同年代嘅工程師前輩以至正投身工程界嘅各位，均是建設社會的棟樑骨幹，多年來參與並見證着香港嘅發展，為建設社會而努力作出嘅貢獻，實在毋庸置疑。

香港工程師學會今年的主題是「以工程師為傲」，我們希望每一位會員都以身為專業工程師嘅身份感到自豪，一同以「元氣彈」嘅理念，肩負提升工程專業形象這個重要使命，突顯工程界嘅專業精神。今年學會更有三大口號：

1. 「全心全意，以真誠、勤奮的態度為社會提供最優質的專業工程服務」；
2. 「說好工程故事」：即讓大眾了解每項工程背後嘅故事，展現工程師嘅專業精神同貢獻；
3. 「培育有抱負、有才華的新一代」：我哋要提供資源，幫助年輕一代發展成為讓自己、讓業界感到驕傲的專業人士，在未來發揮延續工程行業嘅重要角色。

我不時提醒自己和身邊嘅年輕一代，身為一個專業工程師，能夠為市民提供佢哋生活必需嘅服務，是一件值得驕傲、光榮嘅事情。亦是這份堅持和信念，推動着一代又一代嘅工程師，默默建設一個更加美好嘅香港，推動着香港嘅進步。

培育未來傑出工程師是學會一直努力嘅目標。今日開幕禮，我哋就邀請到一班未來棟樑出席。早於去年 10 月，學會開始廣邀全港中學及大專院校學生參加名為「未來城市·一同創造」創新設計比賽，讓年輕人從智能技術、綠色交通、創新及未來元素等角度出發，構建心目中的未來宜居城市、化成 3D 模型或短片，讓學生能從工程專業角度考慮建構未來社會所需要嘅心思和承擔。

今日好開心可以見到未來工程界嘅「接班人」，因為創新設計比賽收到超過 40 份作品，經評審後，各個組別的最後三強都已經來到今日開幕禮現場，佢哋剛才已經透過短片，向一眾嘉賓分享自己嘅作品，稍後我哋會即場揭曉得獎者名單，屆時請大家記得給予年輕人更多嘅掌聲，鼓勵他們發揮創意和想像力，建設香港嘅未來。

今日開幕典禮之後，我亦誠邀各位到西九文化區海濱走走，參加今日下午開始嘅香港工程師週嘉年華，我們會有 40 多個攤位一連三日以有趣、深入淺出嘅方法向公眾展示日常生活嘅工程應用，透過「Σ(食住行)“Our living, we engineer”」為主題，分享工程師在社會建設、未來城市發展、科創工業等領域中嘅重要角色，並讓大眾學習日常生活各類型嘅有趣工程知識。未來數天，我們還會舉行國際會議、香港工程師學會大獎頒獎禮，以及單車及跑步籌款活動，齊集香港工程界的精英，上下一心為提升工程師嘅專業形象，推廣工程專業給社會大眾。在此，我要借呢個機會，感謝各參展商贊助嘅公司、機構，同埋學會分部、秘書處同事、籌備委員會各成員嘅共同努力，帶來內容豐富嘅工程師週活動，盡力展現工程師的多元面貌。

最後，我再次衷心感謝各嘉賓、政府部門、贊助單位等支持，以及每位在工程業界默默付出嘅人，讓我們能繼續以真誠、勤奮嘅態度，為市民，為身邊嘅親朋戚友，以及下一代建設更加美好、快樂嘅香港，讓社會各界都「以有工程師為傲！」

**Let's all be proud to be engineers!**

多謝各位！

香港工程師學會  
會長卜國明工程師